

non scripte partide per il Consolo morto, stato 6 mesi amalato, sichè bisogna drezar le scritture; ha eleto 2 a questo effetto insieme con lui; ha trovà debito cotimo saraffi 130 milia. Scrive, atenderà a francharlo. Voria libertà poter spender e conzar. Scrive, il Gazeli voria 200 remi per una sua fusta ha fato far. Prega la Signoria li mandi. Tutto de li è pacifico et in quiete. Atende a pagar creditori di cotimo.

Di Crema, di sier Andrea Foscolo podestà e capitano, di 3. Scrive, le fabriche ha fato in quella terra e li torioni. Et che à posto San Marco, e trovà uno San Marco era in man di alcuni subditi di Milan, valeva ducati 70, à auto per ducati 4 et lo ha posto suso; et altre particolarità zereha tal fabriche.

Fu posto, per li Consieri e Savii dil Consejo e Terra ferma, atento sia stà pagà per la Signoria nostra ducati 2000 a li eredi dil qu. Agustin Gixi per li alumi etc. *adeo* dove si vendeva ducati 20 è calati ducati 16, et essendo cossa justa chi sente il beneficio debi sentir lo incomodo, per tanto sia preso: che per do anni *solum* tutti li tentori tenzerano panni in questa terra debano pagar tanto per panno *ut in parte*, da esser scossi per li Provedadori di comun, e non pagando pagino con pena. *Item*, quelli di la Zueca botege di ducati 40 per una pagiuo *etiam* loro *ut in parte*. *Item*, tentori di seda consuma alumi g. 16 per botege et sia incantà il dazio, e questo per satisfazion de li ducati 2000 ha pagà la Signoria nostra a diti Gixi. Fu presa. Ave 124, 50, 2.

Fu posto, per li Savi loro, certa parte longa, che li nodari di questa terra, sì di Venetia, come imperiali, siano revisti et examinati per il Canzelier grandò e canzelieri inferiori, con molte clausole. *Item*, li nodari di officii di San Marco come di Rialto; e trovandoli non sufficienti siano cassi, e il deposito haveseno fato, siano fati creditori di la metà di quello a le Cazude; e che diti nodari dagino uno candeloto da lire 2 a San Marco el dì di San Marco di April, con altre clausole. La qual parte era injusta. Volsi contradir. Fata notar per il Canzelier grandò . . . sier Gasparo Malipiero andò suso, fo rimessa.

Fo leto una suplication di sier Francesco di Prioli qu. sier Marco, debitor di la Signoria di perdeda di daci, zà più anni domanda sia suspenso li so debiti. Et fu posto per tutto il Colegio suspenderli per do anni, presa: 166, 7, 0.

Fu leto una altra di sier Zacaria Bembo qu. sier Francesco, debitor di perdeda daci di la nuova e di altre angarie non pagate, et è debito più di ducati 295 * 2000, come apar qui avanti, et però domanda sia su-

speso li soi debiti per anni do, justa il solito. Et fu posto per li ditti suspender *ut supra*. Fu preso. Ave 155, 17, 1.

Fu leto una suplication di . . . di Salò condutieri dil dazio di la merchadantia di l'anno . . . quale ha perso, è debitor di L. . . La causa fo per il postier posto per quelli di Verona et Desanzan. E leto letere molte etc.

Fu posto, per li Consieri, Cai di XL e Savii, che atento le raxon predite, il dito debito di L. . . sia anulato, e cussì sia scritto al Provedador di Salò conzi le scritture. Fu presa.

Fu leto una suplication di Filippo Agustini fo fiol di Piero, domanda la expetativa di quadernier de la camera di Candia da poi la morte di Ziprian Rizo è al presente, e vol donar a l'officio sora le aque ducati 300 al presente.

Et fu posto, per sier Antonio Condulmer, sier Gasparo Malipiero, sier Marin Morexini savi sora le aque, acetar la dita oblation, con questo li dagi in contanti in termine di zorni 8 *aliter* tal concession non li vagli; et li danari siano spesi in cavation de li rii di questa terra e non in altro. Io la vulsi contradir: è cosa cativa, sì per dar expetativa a lui o so fiol, come perchè è officio dil rezimento di Candia a farlo, poi dia valer ben, et si haria potuto haver più danari quando si havesse fato la proclame. *Tamen* non era di voja, lassai scorer.

Fu posto, per li Savii, di far le porte dil sostegno di la Polesela. Per tanto sia preso che tutti li campi di Polesene di Ruigò debano pagar pizoli mezo per campo, da esser scosso per la camera di Ruigo, qual habi 5 per 100 di quello scoderano. *Item*, *etiam* la Signoria, per li campi l'ha, debi contribuir. *Item*, quelli hanno liveli pagi, et poi si vegni a questo Consejo per ricuperar il danaro per tenir in conzo el sostegno per l'avenir.

Fu posto, per li Savi, mancando uno homo d'arme in la compagnia di Zuan di Saxadelo, et avendo uno fradelo nominato Ruberto, qual à auto 50 lanze con fiorentini e desidera servir la Signoria ma con dito so fradelo, però sia scripto a Verona lo debi notar per homo d'arme in ditta compagnia. Fu presa 127, 4.

Fu posto, per li Consieri, Cai di XL e Savi, atento sier Andrea Badoer el cavalier, fo ambador in Ingiltera, come questo Consejo intese, per bisogno di danari la cadena li donò quel Re impegnò al vice canzelier de li per ducati 300, qual è morto, nè è possibile più averla per esser ditta cadena andà in sinistro, *unde* non la potendo apresenter, sia preso